

Utusan 13/3/14

Wacana Pemikiran Islam di UniSZA Sabtu ini

KUALA TERENGGANU 12 Mac - Gagasan Pendidikan Melayu Malaysia (Gagasan) akan menganjurkan program Wacana Pemikiran Islam: Perubahan dan Cabaran Pelajar-Pelajar Melayu di Kampus Universiti Sultan Zainal Abidin (UniSZA), Gong Badak dekat sini Sabtu ini.

Program anjuran bersama Yayasan Pelajaran Mara dan Majlis Perwakilan Pelajar (MPP) UniSZA itu akan dirasmikan oleh Pengarah Perancangan Strategik Jabatan Perdana Menteri, Datuk Shahlan Ismail.

Setiausaha Agung Gagasan, Syed Anuar Syed Mohamad berkata, wacana itu akan disertai 300 peserta terdiri daripada pelajar UniSZA, Institut Pendidikan Guru Malaysia Dato' Razali Ismail dan pelajar tingkatan enam.

Beliau berkata, objektif program itu antara lain untuk memberi bimbingan dan pendedahan kepada pelajar mengenai tanggungjawab mereka dalam menimba ilmu pengetahuan, mempunyai kecemerlangan dalam akademik dan sahsiah diri.

Selain itu, jelasnya, ia juga bagi membentuk pelajar yang mempunyai azam dan iltizam untuk lulus cemerlang dalam peperiksaan serta berketerampilan, menyuntik semangat dan kekuatan mental serta fizikal kepada pelajar dalam menghadapi saingan dan cabaran.

"Malah, menerusi program ini, para pelajar boleh merancang dan mengurus diri dengan lebih efisien dalam pembelajaran di samping membina semangat jati diri, cintakan agama, bangsa dan negara," katanya di sini.

Utusan 13/3/14

CRIM UniSZA anjur MPI'14

KUALA TERENGGANU 12 Mac - Pusat Pengurusan Penyelidikan dan Inovasi (CRIM) Universiti Sultan Zainal Abidin (UniSZA) akan menganjurkan Minggu Penyelidikan dan Pertandingan Inovasi (MPI'14) bermula 16 hingga 19 Mac ini.

Penyelaras program, Dr. Khamisah Suryati Mohd. berkata, program itu bertujuan mendedah serta membentangkan hasil penyelidikan yang dijalankan oleh penyelidik UniSZA kepada umum.

Katanya, selain itu, program tersebut juga diadakan bagi menguar-uarkan hasil penemuan baru yang berpotensi serta dapat dikomersial dan dimanfaatkan sama ada di peringkat negara atau antarabangsa.

"Program ini adalah selaras dengan usaha kerajaan dalam mempromosikan inovasi sebagai medium mencipta kekayaan negara dan dasar semasa kerajaan selain membina jaringan perhubungan dan perkongsian pintar di antara penyelidik UniSZA dan pihak luar," katanya dalam satu kenyataan di sini.

Tambah beliau, pelbagai aktiviti turut diadakan sempena MPI'14 termasuklah pembentangan projek penyelidikan, pertandingan inovasi, pameran penyelidikan dan inovasi, ceramah industri dan sebagainya.